

SARA CITA

OM SUASTIASTU

Om Awigenamastu nama siiddam ,sawetning inucap desa puniki sinanggeh pasubayan

Para kramanya keteka –tekaning kula-kula warganya. Memuat babawos deresta desa puniki sinanggeh bhuwana agung muah keramanya ,pawonganya sinanggeh bhuwana alit. Adung petemon kang bhuwana rwa ngawatuang kahuripan sekala niskala ; karma desa adat anggungan gumawe awing –awing pakraman maka sepat siku.–siku pamatut ,dumadak kasiddan saprayajanan titiyang sareng sami ,mogi –mogi prasama suka angidep muah amagehaken linggih awig –awig inucap

SARGAH PARTAMA

RAN LAN WAWIDANGAN DESA

Pawos 1

(1)DESA puniki mawasta DESA Adat Anggungan ,DESA CARANGSARI ,KECAMATAN PETANG Kabupaten BADUNG ,Provinsi BALI

(2) Jebar kakuwub wawidanganya wawetes catur

Ha. Wares sisi waten Tukad Yeh Ayung

Na. Wates sisi kidul Desa Adat Batas ; DS Karangdalem

Na. Wates sisi kulon Desa Adat Carangsari ;kauh pangkung Jempeng

Ca. Wates sisi lor Desa Adat Carangsari ;Pangkung mati *br sangat*

(3) DESA Adat Anggungan puniki kawangun \kasanggra antuk 15 karang ayah DESA ,siorring punikia munggah dados karma banjar

SARGAH KALIH

PATITIS LAN PAMIKUKUH

Pawos 2

DESA Adat Anggungan ngemanggehang Pamikukuh minakadi

(1) Pancasila

(2) UUD 1945 pemekas pasal 18

(3) Perda Provinsi BALI NO 8 Tahun 1986

(4) TRI HITA Karana manut tatacara Agama Hindu .

Pawos 3

Luir patitis Desa Adat Anggungan :

- (1) Mikukuhin muah ngrajegang Adatlan Agama;
- (2) Nginggilang tata prawertine magama, ngrajegang pangrastiti ring sekala kalawan niskala majalaran antuk panca yajnyane;

SARGAH TIGA  
SUKERTA TATA PAKRAMAN

Palet 1

INDIK PAKRAMAN

Pawos 4

- (1) Sane sinanggeh krama sang sane sampun prasida ngenahin karang ayahan desa;
- (2) Yadyastutn sane durung polih ngenahin karang ayahan desa, yan sampun satinut ring urah-arih swadharmane ring desa;
- (3) Sewos ring sane munggah ring ajeng, angka 1, sinanggeh tamu;

Pawos 5

Krama Desa wenten 4 (petang) pawos :

- (1) Krama pangarep, warga desa sane sampun jenek magenah ring karang ayahan desa;
- (2) Krama Pangele, warga saking krama pangarep sane sampun angalap rabi kasinanggeh magenah ring karang ayahan krama pangarep;
- (3) Krama Taruna, warga muah anak putrinya saking krama pangarep sane sampun nemu kanya muah jajaka, sane kari kasinanggeh ring krama pangarep;
- (4) Krama dunungan tan pakarang ayahan desa;

Pawos 6

Kawit dados krama desa :

- (1) Mawit saking ngelaliang karang ayahan desa;
- (2) Sangkaning pawiwahan;
- (3) Ngawit saking pinunas ngraga sangkaning sampun madrebe karang paumahan;

Pawos 7

Panemaya tedun makrama desa;

Ngawit dados krama desa ritakala sampun nemoning paruman desa;

Ayah-ayahan lan papeson krama :

- (1) Krama pangarep kari jangkep alaki rabi sane wenten sane wenten lanang wadone ayah-ayahan lan papesone tegep;
- (2) Krama pangarep balu ngempu silih asih\* ( wenten lanang - wadonya) kadi mungah ring ajeng (angka 1), ayah-ayahan lan papeson tegep;
- (3) Krama pangele lan krama truna-truni, ayah-ayahan miwah papesonya manut kabuatan;

Pawos 8

Krama Desa kadadosang mapuankid :

- (1) Mayajnya minakadi risedek ngawentenang yajnya;
- (2) Matepetin sakit/anak sungkan miwah kanjekan katiben sakit;
- (3) Kanjek kacuntakan (nganinin karya suci);

Palet 2

INDIK PRAJURU DESA

Pawos 9

Ring Desa Adat Anggungan kadegang :

Ha. Kelian Desa Adat, maka pangenter ring Desa ;

Na. Ring Banjar kadegang Kelian Adat (Kelian Banjar);

Wewenang miwah swadharmaning prajuru desa:

Pawos 10

(1) Wawenang Kelian Desa Adat :

1. Wenang nitahang krama desa adate, yan wenten kapisaratane ring desa muah wenang nitahang prajuru desane sewosan;
2. Wenang .....rumaksa sahanan druwen-druwen desane;
3. Wenang mawosang miwah niwakang pamutus arep ring wicara warga desane, kasanggara antuk prajuru desane sewosan manut awig-awig;
4. Nuntun lan ngenterang krama desa ngupadi manut patitis;

(2) Swadharma Kelian Desa Adat :

1. Swadhamanya kelian desa adat, kapatut pikukuh anut ring kawentenan, anut ring awig-awig, anut ring pararem miwah anut ring dresta tur mangda madasar antuk pahetangan tri pramana;
2. Maweh tuntunan ring para krama desane miwah maweh katuladan sakabuatan;
3. Mangda maweh sasuluh ring para kramane, mangda sami pada pikukuh nganggen agama;

Pawos 11

Petias utawi olih-olihan prajuru desa;

1. Luput pasayahan ayah-ayahhan ;
2. Petias wyadin olih-olihan sewosan manut pararem;

Prajuru Desa kawusang/kagentosin :

1. Wit sangkaning nemu pati;
2. Wit sangkaning magentos ninggal desa
3. Wit sangkaning pinunas ngraga;
4. Ngentosnin prajuru desa patut sajeroning paruman desa;

Palet 3

INDIK KULKUL

Pawos 12

Kawentenan kulkul ring desa Adat Anggungan :

1. Kulkul Desa;
2. Kulkul Banjar;
3. Kulkul sekaa-sekaa;

Tabuh tatepakan suaran kulkul desa/banjar :

1. Tabuh banban-keras-banban : tengeran makarya utawi medal parum (patabuhan kalih tulud);
2. Tigang kientungan kalayu sekar (anak seda);

Pawos 13

1. Kulkul Desa utawi Banjar tan wenang katepak, yan tan sangkaning pituduh prajuru desa utawi banjar, sajabaning kapanca bhayanan;
2. Sang nepak sangkaning tan pituduh patut digelis ngawentenang atur maka buatan nepake, yan nenten asapunika kawentenan sang mamurug keni danda manut pararem;

Palet 4

INDIK PARUMAN

Pawos 14

1. Paruman krama desa kawentenang nyabran tigang'sasih;
2. Manut kabuatan ring krama desane

Kawentenan krama desa, madudonan kadi ring sor :

1. Kamanggala antuk tengeran kulkul;
2. Sang sane ngamiletin paruman mangda mabusana adat (nyalempot tur tan kalugra makta gagawan);

Pawos 15

1. Sajroning paruman krama desa, prajuru desa patut nyiarang kawentenan pamargine ngenterang desa pamekas:
  1. Artha brana druwen desa;
  2. Indik kawentenan pawangunane ring desa;
  3. Indik rencana (pidabdab) nganinin usaha desa kapungkur;
2. Pamuput paruman desa, sinanggeh pararem maka pitegep palaksananing awig-awig;

Pawos 16

1. Sangkepan prajuru desa kawenang ngrencanang pidabdab panrancana usaha desane kapungkur;
2. Sangkepan prajuru desa tan wenang ngamedalang tatibak tategenan ring krama desane, sadereng kaingkupin antuk kramane;

Palet 5  
INDIK DRUWEN DESA  
Pawos 17

Druwen desa adat Anggungan.

Pura-pura (Kahyangan) :

1. Pura Kahyangan Tiga : Pura Puseh, Desa, Dalem;
2. Pura Prajapati;
3. Pura Melanting;
4. Pura Gunung Sari (Pucaksari);
5. Pura Dagul;
6. Pura Kasur Sari;

Palet 6  
SUKERTA PAMITEGEP  
Kaping 1  
KARANG, TEGAL LAN CARIK  
Pawos 18

Pangemong karang ayahan desa patut nyengkerin karang inucap antuk tembok miwah sadurunge kasidan kengin antuk pagehan entik-entikan; Pamekas ipun mangda sida masengker tur mangda sida becik pakantenane. Maliha mangda sida adung (anut) ring panyanding. Pedum sengkeran, wates sasengkeran kangin miwah kaja patut kakaryanin antuk sang ngemong karang inucap, inggih punika mawates magagaleng kaluwan. Sowang-sowang paumahan patut patut polih padum margi medai;

Pawos 19

Sinalih tunggil krama desa miwah banjar tan kalugra :

1. Ngalah-ngalah margi, ngarusak margi miwah katekaning pakarangan, tegalan, pasawahan paderbean anak sewosan;
2. Ngalah-alah tanah desa, tanah setra, tanah pura, yadyastun tanah sane sewosan sane tan gumanti paderbeyan nyane, miwah sakancan tanah suci;
3. Yaning wenten prade sane mamurug patut kapidanda manut ring pararem;

Kaping 2  
PAPAYONAN  
Pawos 20

Tatanduran tanem tuwuh ring sajeroning pakarangan, miwah ring sajeroning panegalan patut mapahimbang saking tembok (sasengkeran) adepa agung ngajerowang.

Prade wit tatanduran inucap wyadin rarambyakan papah miwah carang nyane ngalintang ring wawatesan miwah kateka-tekeng tarune, tatanemane sane sewosan, wenang kasepat gantungin tur sang sane maderbe patut ngerabasin, katotor wyadin mamonggol.

Yaning wenten taru sane kasinanggeh jagi mayanin ring pakadin nyane miwah majeng ring anak sewosan, punika patut digelis kawentenang paigum tur mangda kaicenin pamatut saking desa/banjar, manut kawentenanya :

- I. Yan taru punika tan manut tatanduranya tur sering sampun kapawarahin, saking pananduranya, punika patut sang sane maderbe ngebah sagelisa;

Kaping 3  
WAWANGUNAN  
Pawos 21

Nyabran ngardi wawangunan ring pakarangan utawi ring sowang-sowang genah sane kanggeh padreben desa adat patut :

- Ha. Ngatur piuning ring prajuru desa/banjar mangda kapitetesang genah nyane, mangda nenten ngardi wyadi kapungkur.
- Na. Manut anut ring pituduh, ngangge pahetangan asta bhumi, asta kosaja-kosali miwah mangda anut ring patitis niskala ngawentenang genah pangastiti ring Hyang.
- Ca. Toyan capcapane tan kapatut jantos ngenenin tembok wawatesan.

Kaping 4  
WAWALUNGAN  
Pawos 22

- I. Sahanan krama utawi warga desa sane miara salwiring wawalungan mangda sami siaga yadyastun ingon-ingon mangda katitenin mangdane tan jantos ngarusak tegalan, pasawahan, minakadi tatanduran miwah pabyanan.

2. Tan kapatutang malalumbaran miwah mangon-angonan.
3. Yaning wenten prade wawalungan malumbar ngarusakang tatanduran utawi pabyanan patut kapidanda manut ring pararem.

#### Kaping 5

#### BHAYA

#### Pawos 23

1. Parindikan bhaya minakadinya ; kapancabhaya :
  - Ha. Bhaya katunuan.
  - Na. Bhaya kabalabaran.
  - Ca. Bhaya karubuhan.
  - Ra. Bhaya kacolongan/kamalingan.
  - Ka. Bhaya kaamuk.
2. Sang manggihin sahananing bhaya/jiwa bhaya patut maweh mapitulung tur nepak kulkul bulus manut tatabuhan kulkul inucap.
3. Ring genahe sane kahanan bhaya, yening kantos padem patut ring genahe inucap kakaryanang upakara.

#### Kaping 6

#### PANYANGGRAN DESA MUAH BANJAR

#### Pawos 24

Krama desa miwah krama banjar rikala ngawentenang :

1. Pamekas ring yan prade pamangku kahyangan tiga sane kari jejer ngamangkunin ring amonganya raris ngemasin pati, pidaging gumanti punika polih panyanggra saking krama desane sami ngalantur maweh dhana, gumanti angge panyanggra prabea pamuput nyane pelaksana pitra yajnyanya, manut pararem.
2. Sane kasinanggeh karya pasuka-duhkan/suka-duhka minakadi :
  1. Dewa yajnya.
  2. Resi yajnya.
  3. Manusa yajnya.
  4. Pitra yajnya
  5. Bhuta yajnya.

SARGAH EMPAT  
SUKERTA TATA AGAMA

Palet 1

INDIK DEWA YAJNYA

Pawos 25

1. Kawentenan pelaksanaan dewa yajnya ring Desa Adat Anggungan :
  - Ha. Ring pura kahyangan tiga; Pura Puseh, Desa, Dalem.
  - Na. Ring pura-pura sane sewosan sane kasinanggeh panyiwian desa; Pura Prajapati, Pura Melanting lan Pura Bedugul.
  - Ca. Ring kakuwub krama, ring sanggar pamrajanya, ring Panti Paibonya miwah ring Kawitan leluhurnya.
  - Ra. Ring kanjekan rerahinan jagat, minakadi; Galungan, Kuningan, Pagerwesi, Saraswati miwah ring rahina-rahina sane sewosan.

Pawos 26

1. Pawiden Ida dane desa adat.
2. Ngadegang pamangku nganut dudonan kadi ring sor :
3. Tan wenang angge pamangku :
  - Ha. Ceda angga.
  - Na. Sang sapa sira ugi sane tan kapatutang antuk desa.
4. Prabea kapamangkuan :
  - Ha. Madiksa, pawintenan, upasaksi kawidhi miwah sane sewos-sewosan sami kasanggra antuk desa.
  - Na. kawekas kalaning imangku nemu pati kapatut kararemin antuk para krama desane.

Pawos 27

Swadharmaning Pamangku.

1. Nyanggra sakalwiring upakarane ring pura kahyangan miwah rawuhing ring para kramane sowang-sowang manut kabuatan.
2. Rumaksa katekaning nureksa kawentenan ring pura, minakadi ngrajegang kasucyane ring pura.
3. Pemangku tan wenang majenukan miwah sane sewos-sewosan

Pawos 28

Petias utawi olih-olihan pemangku :

1. Pahan sarin canang nuju piodalan ring pura.
2. Luput pakaryan pakraman miwah peson-peson ring desa manut pararem.

Pawos 29

Pemangku kagentosin rikala :

1. Nemu pati.
2. Mawit saking pinunas ngraga.
3. Gumanḡi kawusang saking desa/krama.

Pawos 30

Kasukerthaning Kahyangan kadi ring sor :

1. Tan kalugra ngaranjing ka pura luire :
  - Ha. Saking katiben cuntaka mawit kapatyan, nganutin catur cuntaka.
  - Na. Sang wadon kacuntakan ngawit angraja, lamin nyane yan tan kapialang wantah 3 dina utawi salamin nyane sakantune ngamedalang rah (darah).
  - Ca. Mawit sangkaning aputra.
  - Ra. Sebel pangantenan salami sadurunge mabyakala.
  - Ka. Miwah sane sewos-sewosan manut pararem.
2. Pelaksana sane tan wenang ring sor :
  - Ha. Masumpah ring pura yan tan sangkaning pangarsan krama desane.
  - Na. Malalumbaran utawi nganon sakalwiring ingon-ingon.
  - Ca. Makta sahananing barang sane kasinanggeh ngaletihin.
  - Ra. Mabusana sane tan manut kadi tatacaraning ngranjing kapura.
3. Sang mamurug kadi kecaping ring ajeng, keni pamidanda manut pararem.

Pawos 31

1. Yan prade ring pura/kahyangan dhurmanggala wiadin sapunapi ugi kawentena ne mangda gelis ipemangku ngarawuhin/nguningayang ring prajuru, sagelisa mangda kawentenang upakara.

Palet 2  
INDIK RESI YAJNYA

Pawos 32

1. Sewos ring Pamangku sang pacang madeg Pandhita, Resi, Empu, Dadukun, Sonteng, Dalang miwah sakalwiring sane jagi ngenterang upakara (babantenan) yajnya patut ngrawuhin ring prajuru tur nguningayang ring sang rumawos.

Pawos 33

1. Sang sulinggih patut ngutamayang pamargine ring desa.
2. Krama desa masarengan ring prajuru patut satinut jagi mapidabdab, ngenterang mangda sida sakalwiring yajnyane mamargi sapatuta, tur mangda polih pamuput sakabuatnya.

Palet 3  
INDIK PITRA YAJNYA

Pawos 34

1. Pamargin Pitra Yajnya madudonan kadi ring sor :
  - Ha. Mapendem utawi mageseng minakadinya makingsan ring ibu pertiwi, miwah Ida Sanghyang Brahma tur layonan sang nemu pati patut saha pangentas.
  - Na. Atiwa-tiwa (mabenan) manut pawacakan panca atma prathista, widhi sastra miwah sane sewosan.
2. Sapuput karya matiwa-tiwa kadi inucap, ngalantur ngalaksanayang pangrorasan, nyekah/mamukur.

Pawos 35

Swadharma muah tategenan.

1. Yan prade wenten sinalih tunggil krama nemu pati, warga kapatutan sang sane sda patut :
  - Ha. Ngawentenang pangrawuh/pasadok ring prajuru banjar, nguningayang kawentenane.

- Na. Rawuh panguningane ring prajuru desa gumanti nunas pamargin sang seda, miwah nunas setra.
2. Mungging panyanggra pesangon majeng ring krama banjar manut dudonan pakaryan miwah dhana manut pararem.

#### Pawos 36

Tan kalugra ngutang sawa kasetrane kanjekan :

1. Piodalan/rahanan ring kahyangan tiga/ pura panyiwian desa.
2. Kanjekan dina purnama, tilem, prawani, rahanan jagat, kala gotongan, semut sadulur miwah kanjekan dinane sewosan manut dresta ring desa, miwah ring dinane dora/pasha.
3. Sawaning wong rare tan pangetang dina muah tan wenang nyekeh sawaning rare.

#### Pawos 37

Mungging kacuntakan kadi ring sor :

1. Sebelan/kacuntakan mawit saking kapatyan manut catur cuntaka:
 

Ha.	Sang maraga brahmana, 10 dina.	}
Na.	Sang maraga satriya, 20 dina.	
Ca.	Sang maraga wesya, 30 dina.	
Ra.	Sang maraga sudra, 42 dina.	
2. Pangambilan cuntakane inucap ngawit saking palebon tur maweweh mawit nemu patine, manut kawentenan.
3. Nganinin ring sewos warga banjar/desa sebelane manut selong nyane nganutin pararem banjar.
4. Tan kene cuntaka mangku kahyangan tiga.

#### Pawos 38

1. Pelaksanaan karya patiwatiwan (pangabenan) manut kabuatan krama sowang-sowang, manut kawentenan tur mangda anut ring dudonan, manut ring kakecap dresta agama.
2. Mangda anut pamargi upakarane miwah mangda satinut ring pamargi desa.
3. Pasanguan pangabenan manut dresta/manut pararem.

Palet 4  
INDIK MANUSA YAJNYA

Pawos 39

Pelaksanaan manusa yajnya pangambile ngawit saking wenten bobotan ngalantur kadi ring sor :

- Ha. Upakara magedong-gedongan.
- Na. Maweh dapetan ring sampune rarene medal.
- Ca. Kanjekan kepus udel.
- Ra. Upacara nelahin ring sampune 12 dina.
- Ka. Upacara pacolongan ring tutug 42 dina.
- Da. Upacara nelubulanin/nyambutin ring tutug 3 sasih pamedal rarene.
- Ta. Matatah/mapandes.
- Sa. Mawiwaha.
- Wa. Miwah sane sewos-sewosan.

Upakara inucap nista, madya, utama, manutin dresta agama, manut kawentenan miwah kabuatan.

Palet 5  
INDIK BHUTA YAJNYA

Pawos 40

Bhuta yajnya inggih punika upakara-upakara ring pretiwi lan kahyangan. sarwa prani miwah ring sarwa bhuta kalane. Upakara ring sarwa prani luire :

- Ha. Ring sawa tumuwuh rikala dina saniscara kliwon wariga kawastanin dina tumpek pangatag.
- Na. Ring sarwa ingon-ingon (wawalungan) ring dina saniscara kliwon uye, mawasta dina tumpek andang.
- Ca. Pabyakala ring pretiwi, kahyangan miwah ring bhuta kala, kawastanin caru (macaru), pamargine madudonan manut wiguna, nista, madya, utama muah sakabuatan sowang-sowang kadi ring sor :

1. Eka sata.
2. Panca sata.
3. Panca sanak.

4. Panca kelud.
5. Resigana.
6. Tawur agung.

#### Pawos 41

1. Pacaruan ring dina tileming kasangha, nista, madya, utama manut unggawan, nyabran ngamasa/warsa isaka, kawastanin tawur kasangha.
2. Pamargine ring Bale Agung pura Desa, miwah ring pempatan agung.
3. Ring dina benjangnya ngalantur kawentenang panyepian :
  - Ha. Amati geni.
  - Na. Amati karya.
  - Ca. Amati lelanguan.
  - Ra. Amati lalungan.
4. Babratan inucap kamargiang arahina wengi, gumanti nyambut paweweh tahun/ warsa isaka, saking ngawit dina panyepian inucap.
5. Pamargi puniki wantah nyepiang raga.

#### SARGAH LIMA

#### SUKERTA TATA PAWONGAN

#### Palet 1

#### INDIK PAWIWAHAN

#### Pawos 42

1. Pawiwahan inggih punika patemoning purusa lawan pradana. Malarapan pakahyunan pada arsa (sukacita) saha kadulurin antuk upasaksi sekala niskala.
2. Pelaksanaan pawiwahan luirnya :
  1. Mawit saking papinangan (papadikan).
  2. Mawit saking ngarorod.
  3. Pidabdab sang mawiwaha patut :
    - Ha. Sampun mamanggeh daha truna ( mangda adung ring pidabdab guru wisesa).
    - Na. Sangkaning pada suka.
    - Ca. Yan prade sang lanang sang istri masewosan agama kapatut kapastikayang rihin patitis sang mawiwaha, miwah yan manut dresta, sang pradana kapatut nginutin sane kasinanggeh purusa.

Pawos 43

Tatacara pamargi babawosan indik pawiwahan :

1. Yan prade pamargine mawit papinangan :
  - Ha. Pangrihin saking warga lanang rawuh ring unggwan sang istri, ngamargiang papinangan manut dresta.
  - Na. Ngalanturang babawosan pasuwakan sahakabuatan manut dresta, maka cihna papinangan sampun kaprasida.
  - Ca. Pangambilan saha babawosan pawiwahan manut sakabuatan.
  - Ra. Salamin tata pamargin babawosane inucap ring ajeng (ha, na, ca ) sang sane ngamargiang papinangan patut mangda malarapan saking prajuru banjar utawi desa.
2. Yan pamargine marangkat kawit saking ngrorod patut :
  - Ha. Saking warga sang lanang sagelisa ngarawuhang ring kapatutan warga pamekas ring rama renanya sang istri, mangda sida kahuningin putrinya ngrorod saha saha majalaran prajuru.
  - Na. Ring sampune wenten suaran kulkul pamargi panglukune saking sang lanang, pangrawuhe mangda majalaran prajurun sang istri/kelian banjarnya tur saha tengeran kakelik maka cihna pamargine galang.
3. Pamargi panglukunya sampun pada suka arsa, mungging dudonane pateh kadi inucap ring ajeng, kadi pasuwakan papadikan, jantos puput upakara pawiwahanya, manut dresta desa kala patra.
4. Dharmaning parabhan sang lanang satyeng wadu, sang istri mangda tekek patibrata.

Palet 2

INDIK WUSAN MARABIAN

Pawos 44

1. Indik sinalih tunggil sang lanang utawi wadon ngarihinin nemu pati, sang sane kari urip lanang utawi wadon kawastanin balu.
2. Mawit sangkaning palas, majalaran pad arena maka kalih kawastanin sapyan.
3. Mawit sangkaning palas, majalaran biyut/wyadin
4. Swadharmaning sang palas marabhan :
  - Ha. Sang sane balu mangda ngalanturang kertine ring turunan.

Na. Sang palas sangkaning byuta/wyadi, jagi kapidabdab manut pararem perdamean, tur salantur ipun janten katur ring sang rumawos.

Pawos 45

Yan prade kawekas kajantenang sang palas marabyan, mawali malih adung patut ngawalinin ngardi upakara widhi widhana.

Palet 3

INDIK SANTANA

Pawos 46

Sewos ring Santana sane gumanti wantah medal saking turunan wenten taler sane kasinanggeh Santana kadi ring sor :

1. Santana wit sangkaning pakarsa (adih-adihan) paperasan, lanang wiadin wadon, kawastanin Santana purusa.
2. Santana lanang wit saking ambil-ambilan pawiwahan kawastanin Santana nyeburin kasinanggeh Santana pradhana.

Pawos 47

Ngadegang Santana :

Mungging pamargi jagi ngadegang Santana makadi ring sor :

- Ha. Sadurunge mangda sida nemu babawosan sang ngidih kalawan sang kaidih muah ring para warna sama saha lekita.
- Na. Puput pamargine kadi aksara " ha" kalanturang antuk upasaksi ring Hyang saha widhi widhana muah ring prajuru katekaning para krama.
- Ca. Nganinin wit babinjat lanang utawi wadon sadurunge mangda kautsahayang karerehang wali panyayut sang rare, tur kalanturang kaupakarin mangda tan kasinanggeh cuntaka.
- Ra. Mungging pamuput Santana ring ajeng aksara "ca" karajegane manut pararem ring sajeroning warga, saha saksi miwah lekita sajangkep nyane. Sadurunge prajuru desa utawi banjar nyaksi wiadin ngardinin lekita, mangda kalotahang, kasiarang rihin ring desa, mangda pamargine sinang, nemu ring kabuatan.

Pawos 48

Swadharmaning Santana

1. Patut satya, dharma sadu majeng ring sinanggeh guru rupaka.
2. Ngalanturang swadharman guru rupaka ring sakala kalawan niskala.
3. Tan alpaca tur mangda saguluka salunglung ring para warga pasemetonan sami.
4. Satya rarem ring adat miwah dresta agama sane sampun prasida mamargi ring desa.

Pawos 49

Sane kapatutang madeg Santana :

1. Patut kautamayang kapertama mawit saking turunan purusa.
2. Mawit saking turunan dadya.
3. Yan tan polih kadi munggah ring ajeng (1, 2) kangkat saking turunan pradhana tunggal dharma.
4. Pamuput sane polih taler kadi ring ajeng (angka 3) mangda kutsahang saking tunggal banjar/desa.
5. Yan tan polih taler majeng ring (angka 4) kabebasan ngarereh Santana ring luar banjar / desa.

Palet 4

INDIK WARISAN

Pawos 50

1. Warisan inggih punika tatamyian artha brana ayah-ayahan ngupadi sukertha sekala niskala saking kaluhuran majeng ring katurunanya.
2. Artha brana miwah tegal, sawah miwah sane sewos-sewosan tinggalan saking guru rupaka.
3. Kawitan sanggar pamrajan miwah kahyangan..
4. Ayah-ayahan pakraman ring desa/banjar.

Pawos 51

Sang nrima warisan kapatut :

1. Sadurunge patut muputang yajnyane ring leluhur, minakadi nglaksanayang pitra yajnya sapuput nyane.

2. Ngalaksanayang dewa yajnya ring kawitan sanggah/mrajan.

Pawos 52

1. Sane patut nrima warisan :
  - Ha. prasantana wit turunan purusa/sane medal saking pawaris.
  - Na. Prasantana rajeg wit paperasan pawaris.
  - Ca. Prasantana pradhana.
2. Yan prade kaputungan utawi tan wenten prasantana inucap ring ajeng (ha, na, ca) kapatutang :
  - Ha. sane patut narima warisan kulawarganya sang pawaris wit dadya purusa.
  - Na. Sang narima warisan patut ngalaksanayang kadi kapatutang bawos ring ajeng (pawos 51 angka 1 miwah 2).
  - Ca. Yan prade punika tan wenten punika sami-sami, pacang jagi kapidabdab antuk banjar/desa manut pararem.

SARGAH ENEM

WICARA, PRAJURU, PAMIDANDA

Palet 1

INDIK WICARA

Pawos 53

1. Sang sane wenang mawosang minakadi mamutus sakalwiring wicara ring desa, inggih punika prajuru desa, minakadinya Kelian Desa kasanggra antuk prajuru sane sewosan.
2. Pamargin pamutus nganutin pasuara awig-awig, miwah mangda nganutin pramana saha dresta lokika.
3. Yan tan prasida katur ring sang guru wisesa.

Pawos 54

1. Salwiring wicara mangda digelisa kabawosang tur kapatutang, bilih-bilih wicara sane mawiwit kacorahan, dusta miwah wirosa miwah sanungkas ring awig-awig.
2. Sang pamutus mangda jejer ring tatiwak dharma pamutus.

Palet 2  
INDIK PAMIDANDA  
Pawos 55

1. Desa miwah Banjar wenang niwakang pamidanda ring krama/warga desa/banjar sane sisip.
2. Tatiwak danda inucap kalaksanayang olih Kelian Desa Adat/Kelian Banjar manut kawentenan.
3. Pamidanda sane katiwakang patut madudonan masor-singgih manut kaiwangan.
4. Jinah pamidanda/rajabrana olih-olihan pamidanda inucap, kengin ngranjing dados druwen banjar/desa.

Pawos 56

1. Krama sane langkung ring pasengketa manut pararem desa/banjar tan nawur pamidanda, urunan, hutang saselangan wenang karampag.
2. Ngarampag ngangge tata cara kadi ring sor :
  - Ha. Rarampagan kamargiang antuk prajuru desa/banjar kasarengin antuk prajuru sane sewosan.
  - Na. Ambil-ambilan pangrampage mangda kanutang akeh kidik pamidandane, dadosane miwah tatagihane tur saha darsana.
  - Ca. Prajuru mangda miteketang ring sang sane karampagin, mangda barang rerampagan inucap mangdane sagelisa katebus manut sengker.
  - Ra. Yan prade sang karampag tan narima wiadin manulakang indik pangrampagan punika, inggih punika maka cihna sang sane karampag tan tan manut ring pamutus awig-awig utawi pararem desa miwah banjar, sang inucap patut :
    1. Kakenan danda, kararyanang mapakraman manut pararem.
    2. Kalanturang katur ring sang rumawos.
  - Ka. Pamidanda sida buntas minakadi pamidandan sane inucap ring ajeng risampune :
    1. Pamidandane, kenan-kenan paselangane miwah tatebasan barange sampun puput katawur.
    2. Saha nunas pangampura ring desa/banjar riyantukan nguwak pasubayan/pararem, minakadi awig-awig.

3. Nawur danda panguwak pasubaya manut pararem, saha ngaturang prayascitta panyapsap kaiwangan ring desa/banjar.

**SARGAH PITU**  
**NGUWAH-NGUWUHIN AWIG-AWIG**

Pawos 57

1. Nguwah- nguwuhin awig-awig desa puniki, kalaksanayang antuk paruman desa.
2. Awig-awig puniki kamargiang ngawit saking sasampune kaingkupin miwah kararemin.

Pawos 58

1. Salwire sane wenten sadurunge, patut kanutang ring daging awig-awig puniki.
2. Salwiring sane durung kabawos ring sajeroning awig-awig puniki, patut kalaksanayang manut tata cara, dresta sane sampun mamargi tur mangda kadasarin antuk pararem.

**SARGAH KUTUS**

**PAMUPUT**

Pawos 59

1. Awig-awig puniki sampun puput kararemin antuk krama desa adat duk Rahuna Sukra kliwon Wuku Pujut, tanggal masehi 8 April 2005, ring Bale Banjar Desa Adat Anggungan.
2. Awig-awig puniki kalingga tanganin antuk :

Kelian Desa Adat Anggungan,

Kelian Banjar Adat Anggungan,

I Made Sukaryawan

I Made Lancah.

Perbekel Desa Carangsari,

Kelian Dinas Anggungan,

A A. Widya Putra, S. Sos.

I Made Lanchah.

Camat Petang,

Drs. I Ketut Wilen.

Kapikukuh :

Pj. Bupati Badung,

I Wayan Subawa, SH. MH.